

Četrdeset godina Ekonomskog fakulteta u Brčkom

Prošlo je više od 130 godina od kada je, u jesen 1883. godine, u Brčkom osnovana Trgovačka škola, prva škola te vrste u Bosni i Hercegovini. U okviru školske reforme, tokom 1919/20. godine zatvorena je Trgovačka škola, a osnovana Niža gimnazija. Na četrdesetogodišnjoj tradiciji postojanja Trgovačke škole, u Brčkom je 1923. godine osnovana Trgovačka akademija, koja je početkom školske 1930/31. Godine, iz Brčkog preseljena u Banjaluku, da bi u ovom gradu ponovo bila osnovana školske 1939/40. godine.

Školske 1950/51. godine Trgovačka akademija mijenja ime i postaje Srednja ekonomska škola. To ime je ponovo promijenjeno školske 1958/59. godine, od kada se koristi naziv Ekonomska škola. Međutim, školske 1968/69. godine pri Ekonomskoj školi u Brčkom otvorena su dva nova odjeljenja – trgovinsko i ugostiteljsko, tako da je škola dobila naziv Ekonomsko-trgovinsko-ugostiteljski školski centar. Danas, ova ustanova ponovo nosi naziv Ekonomska škola.

U međuvremenu, 1961. godine, u Brčkom je osnovana Viša ekonomsko-komercijalna škola, kao prva visokoškolska ustanova na ovom području. Nakon petnaestogodišnjeg rada, 1976. godine, Viša ekonomsko-komercijalna škola prerasla je u Ekonomski fakultet Brčko.

Ekonomski fakultet Brčko osnovan je 23.09.1976. godine Odlukom Skupštine opštine Brčko. Fakultet je najprije bio članica Univerziteta u Sarajevu, a nakon osnivanja Univerziteta u Tuzli pripadao je ovoj asocijaciji visokoškolskih ustanova. Od 1992. godine Ekonomski fakultet Brčko djeluje u okviru Univerziteta u Srpskom Sarajevu, a danas u okviru integrisanog Univerziteta u Istočnom Sarajevu.

Ekonomski fakultet Brčko je od svog osnivanja do danas bio visokoškolska ustanova šireg regionalnog značaja. Studije na ovom fakultetu upisivali su kandidati iz preko 50 opština sa prostora republika bivše Jugoslavije, odnosno, danas sa prostora BiH, Srbije i Hrvatske.

Fakultet je u okviru nastavnog i naučno-istraživačkog rada razvijao saradnju sa mnogim univerzitetima, srodnim fakultetima i naučnim institucijama iz BiH i drugih republika bivše Jugoslavije. Takva saradnja omogućila je da se na Ekonomskom fakultetu Brčko godinama angažuju eminentni nastavnici i stručnjaci iz ekonomije i srodnih oblasti kako u nastavnom procesu, tako i u različitim vidovima naučno-istraživačkog rada.

U cilju racionalnijeg korišćenja naučno-nastavnog potencijala Univerziteta u Istočnom Sarajevu, Ekonomski fakultet Brčko je ostvario saradnju sa Fakultetom poslovne ekonomije Bijeljina, Ekonomskim fakultetom Pale i Saobraćajnim fakultetom Doboj. Pored toga, razvijena je saradnja i sa ekonomskim fakultetima u Banjoj Luci, Tuzli, Beogradu i Subotici.

Sadašnji razvoj visokoškolskog obrazovanja u BiH, a samim tim i na prostoru Brčko distrikta BiH, obilježen je uključivanjem u Bolonjski proces koji za cilj ima integrisani univerzitet, efikasniji i racionalniji studij, kvalitetniji nastavni proces, primjenu kreditnog sistema za akumuliranje i prenos bodova, kao i veću mobilnost nastavnika i studenata u toku i nakon završetka studija.

Na dugogodišnjoj tradiciji trgovačkog i ekonomskog obrazovanja u Brčkom, ove godine obilježiće se 40 godina postojanja i rada Ekonomskog fakulteta i 55 godina od osnivanja Više ekonomsko-komercijalne škole. To će biti prilika da se još jednom potvrdi uloga i značaj ovih institucija, kako u školovanju visokoobrazovanih kadrova, tako i u naučno-istraživačkom radu, ne samo u okvirima Brčko distrikta BiH i same BiH. Rezultati ostvareni u proteklih četrdeset godina obavezuju sve nastavnike i saradnike Fakulteta na još veće zalaganje i odgovorniji rad na afirmaciji ekonomske nauke i prakse. Na taj način može da se doprinese unapređenju poslovanja preduzeća i efikasnijem radu državnih službi, kako bi se, između ostalog, stvarale i pretpostavke za zapošljavanje novih kadrova koji se obrazuju na Ekonomskom fakultetu Brčko.